



REPUBLIKA E KOSOVËS - REPUBLIKA KOSOVA - REPUBLIC OF KOSOVO  
KËSHILLI GJYQËSOR I KOSOVËS - SUDSKI SAVET KOSOVA - KOSOVO JUDICIAL COUNCIL

**PANELI ZGJEDHOR PËR ANKESA DHE PARASHTRESA**  
IZBORNI PANEL ZA ŽALBE I PREDSTAVKE - ELECTION COMPLAINTS AND APPEALS PANEL

---

**Anr.24/2025**

**PANELI ZGJEDHOR PËR ANKESA DHE PARASHTRESA (PZAP)**, në panelin e përbërë nga gjyqtarët: Kymete Kicaj, kryesuese, Kujtim Pasuli dhe Bujar Muzaqi anëtarë, duke vendosur përkitazi me ankesën e parashtruar nga subjekti politik Socijaldemokratska Unija, me seli në Prizren, paraqitur kundër vendimit të Komisionit Qendror të Zgjedhjeve (KQZ), NR.01/33-2025, të datës 08.01.2025 për shkak të refuzimit për ndarjen e mjeteve nga fondi për mbështetjen e subjekteve politike për periudhën nga Janari 2025 deri me 28 Shkurt 2025 për Financimin e Subjekteve Politike për Zgjedhjet e Përgjithshme për Kuvendin e Republikës së Kosovës, që do të mbahen më datë 09.02.2025, në seancën e panelit të mbajtur më datë 13.01.2025, mori këtë:

## V E N D I M

**Hedhet poshtë e palejuar** ankesa Anr 24/2025 e datës 10.01.2025 e parashtruar nga subjekti politik Socijaldemokratska Unija, me seli në Prizren, kundër vendimit të Komisionit Qendror të Zgjedhjeve (KQZ), NR.01/33-2025, të datës 08.01.2025 për shkak të refuzimit për ndarjen e mjeteve nga fondi për mbështetjen e subjekteve politike për periudhën nga Janari 2025 deri me 28 Shkurt 2025 për Financimin e Subjekteve Politike për Zgjedhjet e Përgjithshme për Kuvendin e Republikës së Kosovës, që do të mbahen më datë 09.02.2025.

## A r s y e t i m

Me datën 10.01.2025, Socialdemokratska Unija, me seli në Prizren, ka paraqitur ankesë në PZAP, në të cilin pretendohet se me vendimin e Komisionit Qendror të Zgjedhjeve KQZ-së është refuzuar kërkesa për financimin e Subjekteve Politike për periudhën TMI 2025, ashtu eshtë sic kërkon edhe Ligji për Financimin e Subjekteve Politike.

Më tej në ankesë parashtruesi thekson se ky vendim është i padrejtë dhe jemi të mendimit që subjektet politike të përfaqësuara në parlament e kanë mandatin deri në zgjedhjen e deputetëve të ri dhe që nuk bën të ndërpritet financimi i subjekteve politike.

PZAP, iu është drejtuar me kërkesë për përgjigje në Komisionin Qendror të Zgjedhjeve KQZ, me datë 10.01.2025, lidhur me ankesën A.nr.24/2025, të parashtruar nga ankuesi Social Demokratska Unija. Me datë 10.01.2025 Komisioni Qendror të Zgjedhjeve-KQZ-së, ka parashtruar përgjigje në ankesë lidhur me ankesën A.nr.24/2025, në të cilën ka theksuar se sipas paragrafëve 3 dhe 4 të nenit 3 të Rregullores Nr.03/2024 Menaxhimi dhe Mbikëqyrja Financiare e Subjekteve Politike, Zyra për Regjistrim, Certifikim dhe Kontrollim Financiar të Subjekteve Politike (ZRCKFSP), në mbledhjen e KQZ-së nr.02/2025, të datës 08.01.2025, ka rekomanduar që 14 subjekte politike të përfaqësuar në Kuvendin e Republikës së Kosovës të iu ndahen mjetet financiare nga Fondi për Mbështetjen e Subjekteve Politike. Rekomandimi (ZRCKFSP), ka përmbajtur shpjegimin e shkruar për secilin subjekt politik. Konform paragrafit 2 të nenit 7 të Ligjit për Financimin e Subjekteve Politike, Fondi për Mbështetjen e Subjekteve Politike, funksionon në kuadër të KQZ-së dhe rrjedhimisht pas pranimin të rekomandimit nga Zyra, KQZ me vendim miraton ose refuzon rekomandimin e Zyrës. Tutje në përgjigje në ankesë theksohet se KQZ, pas diskutimeve lidhur me rekomandimin, me rastin e votimit, rekomandimi nuk mori votat e nevojshme, respektivisht ishin 3 vota për, të cilat të pamjaftueshme për të miratuar rekomandimin.

Paneli, pas shqyrtimit të ankesës së parashtruar nga ankuesi, vëren se e njëjta është e pa lejuar.

Për të vlerësuar lejueshmërinë e paraqitjes së ankesës, paneli iu referuar Ligjit Nr.08/L-228 për Zgjedhjet e Përgjithshme në Republikën e Kosovës, përkatësisht, nenit 119 paragrafi 3, me të cilin është përcaktuar se *“PZAP-i vendos për të gjitha ankesat ndaj vendimeve të KQZ-së, të përcaktuara shprehimisht me këtë ligj.”* Ndërsa kundër të cilave vendime të KQZ-së mund të ushtrohet ankesë është specifikuar me nenet, 27.6, 39.3, 41.5, 46, 51.4, 54.8, 69.7, 77.5, 80.3, 94.2, 98.3, 100.3, 102.1, 103.4 dhe 105.1, si dhe ato të cilat janë të përcaktuara në nenin 9, të Rregullores Nr.01/2024 për Procedurën e Shqyrtimit dhe Vendosijes së Ankesave.

Sipas vlerësimit të Panelit, nga interpretimi i dispozitave të Ligjit Nr.08/L-228 për Zgjedhjet e Përgjithshme në Republikën e Kosovës, nuk përcaktohet me asnjë dispozite ligjore se mund të ankimohen vendimet e kësaj natyre të KQZ-së, përkatësisht, vendimi i KQZ-së për ndarjen e mjeteve nga fondi për mbështetjen e subjekteve politike, në këtë kuptim, paneli vlerëson se rasti lëndor nuk hynë në kategorinë e vendimeve të KQZ-së të cilat mund të ankimohen në PZAP, e rrjedhimisht nga kjo edhe ankesa është e palejueshme.

Prandaj, nga arsyet e paraqitura si më lart, në pajtim me nenin 13 paragrafi 3 të Rregullores së PZAP-it Nr.01/2024 për Procedurën e Shqyrtimit dhe Vendosijes së Ankesave, si dhe nenit 119

paragrafi 3 të Ligjit për Zgjedhjet e Përgjithshme në Republikën e Kosovës, Paneli vendosi si në dispozitiv të këtij vendimi, duke e hedhur poshtë ankesën si të pa lejueshme.

**Paneli Zgjedhor për Ankesa dhe Parashtresa**

**A.nr.24/2025, datë 13.01.2025**

**Kryesuese e Panelit**

Kymete Kicaj



**Këshilla Juridike:** Kundër këtij vendimi është e lejuar ankesa sipas nenit 118 paragrafi 4 të LZP-së, në Gjykatën Supreme të Kosovës, brenda dyzet e tetë (48) orëve nga momenti i marrjes-pranimi të këtij vendimi.